

Post Augustum, sed ante Constantinum, ex his quatuor provinciis tres aliæ ortæ sunt, scilicet Alpina, Viennensis, & Germanica; Alpina quidem & Viennensis ex Narbonensi, & Germanica ex Belgica: adeo ut ex hoc tempore septem in Gallia numerari cœperint, Narbonensis, Alpina, Viennensis, Aquitanica, Lugdunensis, Belgica, & Germanica. Hinc fit ut in Notitia Imperii Romani Gallia & septem Provinciæ sæpius veluti synonymas usurpari soleant. Sic in enumeratione provinciarum, quæ à Galliarum Vicario regebantur, hæc habet: *Sub a dispositione viri spectabilis Vicarii septem Provinciarum.* Sic Vicarios referens Præfectis Prætorio Italiæ, & Prætorio Galliarum subjectos, hæc ait: *Vicarii sex, Urbis Romæ, Italiæ, Africæ, Hispaniarum, septem Provinciarum, Britanniarum.* Sic tandem diœceses Præfecto Prætorio Galliarum assignatas numerans, hæc, ut jam diximus, effert: *Sub dispositione viri illustris Præfecti Prætorio Galliarum diœceses infra scriptæ: Hispaniæ, septem Provinciæ, Britannia.* His nil clarius, ut probemus Gallias in septem provincias divisas fuisse antequam in plures. Denique septem illæ in septemdecim accreverunt, nullo quidem novo nomine cuiquam earum indito, sed singulis in plures divisas, harum unaquæque vetus nomen servavit, cum aliquo adjuncto numerali, per quod à cæteris ejusdem nominis distinguebatur. Verbi gratia, Lugdunensi primum in duas, ex Ammiano, & postea in quatuor provincias divisa, singulæ Matricis nomen servarunt, & vocatæ sunt Lugdunensis prima, secunda, tertia, quarta. Idemque de aliis videre est in Notitia civili Romani Imperii, apud quam non tantum Lugdunenses quatuor leguntur, sed etiam Aquitanicæ tres, Narbonenses duæ, Alpes duæ, Belgicæ duæ, & Germanicæ duæ. Singularum autem præcipuas Civitates, necnon & Castra numeremus ex alia Notitia Civili, quam doctissimus Sirmundus dedit tomo primo Conciliorum Gallia ex Vetus Cod. MS.

NOTITIA PROVINCiarUM, ET CIVITATUM GALLIÆ,

Honorii Augusti, ut videtur, temporibus condita, cum Gallias & septem Provincias distingui mos erat.

Provincia Lugdunensis prima.

Metropolis civitas Lugdunensium.
Civitas Æduorum.
Civitas Lingonum.
Castrum Cabilonense.
Castrum Matisconense.

Provincia Lugdunensis secunda.

Metropolis Civitas Rothomagensium.
Civitas Bajocassium.
Civitas Abrincatum.
Civitas Ebroicorum.
Civitas Sagiorum.
Civitas Lexoviorum.
Civitas Constantia.

Provincia Lugdunensis tertia.

Metropolis Civitas Turonorum.
Civitas Cenomannorum.
Civitas Redonum.
Civitas Andicavorum.